

Disgrazcha zieva duos minuts in l'ajer

Il quartier Alvra a La Punt Chamuesch es in lündeschdi saira zieva las 17.20 disgrazcho ün pitschen eroplan a motor. Quel d'eira partieu pochs minuts avant da Samedan cun la destinaziun Roskilde in Danemarc. Tenor la Pulizia chantunela nun ho üngün dals trais passagers survievü l'accidaint.



Immez il quartier Alvra a La Punt Chamuesch es in lündeschdi zievamezdi crudo giò ün eroplan. Quel d'eira partieu be var duos minuts avant da l'eroport Samedan.



Il pumpiers La Plaiv in acziun a stützer las restanzas da l'eroplan a motor. Tuot ils trais passagers nun haun survievü l'accidaint.

FOTOS PULIZIA CHANTUNELA DAL GRISCHUN

MARTIN CAMICHEL/FMR

Il la regiun da la Plaiv haun in lündeschdi saira normelmaing lö ils exercizis dals pumpiers. Perque nu's varon las abitantas e'ls abitants far scu prüim grands pissers, cur ch'els haun udiu a passer zieva las 17.30 ils veucils da pumpiers cun plaina sirena e cun ün grand tempo da S-chanf in direziun da l'Engiadin'Ota.

Ma ün sguard in direziun da La Punt Chamuesch ho tradieu cha que stu esser capito qualchosa extraordinari: Güst sur il quartier Alvra s'ho nempe derasada üna granda nivila da füm nair. Poch pü tard sun alura già gnidas publichedas las prüimas noviteds davart l'incidaint, nempe ch'ün

eroplan pitschen a motor saja crudo giò a La Punt Chamuesch.

Disgrazcha zieva duos minuts

Scu cha la Pulizia chantunela ho scrit in üna comunicaziun in mardi a mezdi, as trattaiva que tar l'eroplan disgrazcho d'ün eroplan da propeller dal tip Extra EA-400. Quel d'eira già rivo als 13 marz 2025 in Engiadina e's rechattaiva sül viedi inavous. Tenor prüimas retscherchas d'eira l'eroplan partieu in lündeschdi zievamezdi intuoern las 17.20 sülla piazza aviatica a Samedan cul böt Roskilde in Danemarc.

Però be giüsta duos minuts zieva la partenza ho que già do la disgrazcha e que a l'ur da La Punt Chamuesch, nempe il quartier Alvra in direziun dal pass.

Scu cha perdütts haun descrit invers diversas medias svizras, s'hegia l'eroplan pochas secundas aunz la cupicha cumanzo a stordscher e saja svulo per terra. In seguit hegia que do üna granda explosiun cun üna granda balla fö.

Tenor las fotografias da la Pulizia chantunela as vezza cha l'eroplan es crudo giò immez il territori abito. Il vrac da l'eroplan d'eira cumplettaing desdrüt ed ars oura. Perque nu vaivan ils trais passagers üngüna schanza e nun haun survievü la disgrazcha.

Pèrin danais cun lur figl

L'Uffizi federal d'aviatica civila UFAC ho alura in seguit disponieu üna blockeda dal spazi d'ajer sur La

Punt Chamuesch ed in mardi a bunura haun cumanzo las lavours da salvamaint. Tenor la Pulizia chantunela nu s'hegia que aucha pudieu identificher finelmaing ils trais disgrazchos. Ma in mardi zievamezdi ho alura la gjazetta danaisa «Ekstrabladet» rapporto, cha que's tratta tals morts d'ün pèrin d'avvocats danais e da lur figl.

Sper ils pumpiers La Plaiv sun eir stos in acziun il Salvamaint d'Engiadin'Ota, la Rega, l'Uffizi chantunel per la natüra e l'ambient scu eir la Pulizia chantunela. Ils motivs per la disgrazcha vegnan uossa examinats da la Procura publica federela e chantunela, dal Post svizzer d'inquisiziun da sgürezza (SUST) da la Pulizia criminela federela scu eir da la Pulizia chantunela dal Grischun.

«Maurizius» tuorna darcho a chesa

Och mais zieva las ovaziun in lügl 2024 tuorna l'inchaschamaint da funtauna dal temp da bruonz inavous in sieu dachesa, il Forum Paracelsus. Ma cur cha'l relict preistoric saro darcho publicamaing accessibel, nun es pel mumaint aucha cuntschaint.

RTR E MARTIN CAMICHEL/FMR

L'inchaschamaint da la funtauna da Maurizius – chi datescha dal temp da bruonz – spetta daspö lügl 2024 per pudair darcho turner a chesa. Quella vou-ta ho que nempe do ün'ovaziun a San Murezzan Bagn, cur cha l'Ovel da Tegatscha es ieu surour ed ho inundo il local d'exposiziun da l'inchaschamaint –

l'uschè numno Forum Paracelsus. Quel es sto fin ad ün'otezza dad 1,5 meters suot ova. Il relict preistoric da lain s'ho perque distacho da la fixatura ed es nudo ün pèr uras illa ova granda.

In seguit vaiva üna squedra dal Servezzan archeologic dal Grischun – cun sustegn da la Protecziun civila – salvo e constato pochs dans vi da l'ogget cun ün'eted da passa 3400 ans. L'inchaschamaint da funtauna es zieva gnieu süjo controlledamaing cun ajer fras-ch dü-raunt var ün mais e mez in üna halla a San Murezzan Bagn.

Üna cumbinella u ün gö da tetris Uossa, och mais pü tard, sun las localiteds il Forum Paracelsus darcho süttas e la sanaziun da l'edifiz istoric es süin bu-

na via. Perque vain l'inchaschamaint da funtauna pel mumaint darcho monto in sieu local d'exposiziun. Ils var 100 töchs da lain da larsch, chi faun part dal relict preistoric, sun tuots numeros ed haun ün pais tolet da var 1,5 tonnass.

Grazcha ad üna documentaziun exacta cun fotografias d'avant 10 ans, mettan ils experts uossa darcho insembel la construcziun – quasi sumgiaint ad

üna cumbinella u ad ün gö da tetris. In tuot as fo quint cha trais specialistis drouvan var duos dis per darcho monter l'inchaschamaint dal temp da bruonz. Cur cha'l Forum Paracelsus evra darcho sias portas nun es però cuntschaint, causa cha singulas lavours da sanaziun nu sun aucha terminadas. Fin lo restaro eir l'inchaschamaint da funtauna na accessibel pel public.



L'inchaschamaint da funtauna cun ün'eted da 3400 ans es vi da turner inavous il Forum Paracelsus a San Murezzan.

FOTO RTR



Ün trunch da lain da larsch – ün da var 100 töchs da l'inchaschamaint preistoric da la funtauna «Maurizius» – düraunt il sujer.

FOTO MARTIN CAMICHEL



Ün sguard il local d'exposiziun ün di zieva l'ovaziun in lügl 2024. La Protecziun civila d'eira lo giüsta vi da demonter l'inchaschamaint da funtauna dal temp da bruonz.

FOTO MARTIN CAMICHEL